

## მთავარი რედაქტორისაგან

წარმოგიდგინებ „პერსონალურ მონაცემთა დაცვის სამართლის ჟურნალის“ მორიგ გამოცემას, რომელიც პირადი ცხოვრების ხელშეუხებლობის დინამიკურად ცვალებად სირთულეებს ასახავს და მონაცემთა დაცვის სამართლის აქტუალურ საკითხებს განიხილავს.

გასული ათწლეულის ბოლო პერიოდში გაძლიერდა მონაცემთა დაცვის ფუნდამენტური უფლების ერთგვაროვანი რეგულირებისა და ერთიანი პრაქტიკის დამკვიდრების მცდელობები. პერსონალურ მონაცემთა დაცვის ფუნდამენტური უფლება გარანტირებული საქართველოს კონსტიტუციის მე-15 მუხლით, უზრუნველყოფს პირადი და ოჯახური ცხოვრების, პირადი სივრცისა და კომუნიკაციის ხელშეუხებლობის უფლებების დაცვლობას. დემოკრატიულ საზოგადოებაში აუცილებელი სახელმწიფო ან საზოგადოებრივი უსაფრთხოების, ან სხვათა უფლებების დაცვის მიზნით ამ უფლებათა შეზღუდვა დასაშვებია მხოლოდ კანონის შესაბამისად, სასამართლოს გადაწყვეტილებით ან მის გარეშე, კანონით გათვალისწინებული გადაუდებელი აუცილებლობისას. ამ უკანასკნელ შემთხვევაში უფლების შეზღუდვის შესახებ უნდა ეცნობოს სასამართლოს, რომელიც ადასტურებს შეზღუდვის კანონიერებას.

ციფრულ ეპოქაში, როდესაც ტექნოლოგიური განვითარება და მონაცემთა გამჭვირვალე მიმოცვლა ყოველდღიურად ახალ სამართლებრივ თუ ეთიკურ კითხვებს აჩენს, მნიშვნელოვანია, რომ საზოგადოების ცნობიერება მიესადაგებოდეს უალტერნატივო საჭიროებას — ადამიანის ფუნდამენტური უფლებების დაცვის აუცილებლობას ტექნოლოგიური პროგრესის გათვალისწინებით. პერსონალურ მონაცემთა უფლების დაცვისა და ამ თვალსაზრისით საზოგადოების ცნობიერების ამაღლების ერთ-ერთ საუკეთესო საშუალებას წარმოადგენს სამართლებრივი დისკუსია პერსონალურ მონაცემთა დამუშავების აქტუალურ საკითხებზე. სწორედ ამ მიზანს ემსახურება პერსონალურ მონაცემთა დაცვის სამსახურის სამეცნიერო ჟურნალი.

ჟურნალის წინამდებარე გამოცემა მკითხველს პერსონალურ მონაცემთა დაცვის სხვადასხვა აქტუალურ საკითხზე ღრმა სამართლებრივ ანალიზსა და ხედვას სთავაზობს. გამოქვეყნებული ნაშრომები შეეხება ისეთ საკითხებს, როგორებიცაა: პერსონალურ მონაცემთა დაცვის ევროპული სტანდარტების ინტერპრეტაცია და იმპლემენტაცია, მონაცემთა დაცვის საზედამხებელო ორგანოთა საქმიანობა და როლი, ტექნოლოგიური ტრანსფორმაციის ახალი საკანონმდებლო ჩარჩო და სხვა.

მარბურგის ფილიპეს სახელობის უნივერსიტეტის პროფესორის, გერმანიის სოციალურ საკითხთა ფედერალური სასამართლოს ყოფილი მოსამართლის, წინამდებარე ჟურნალის სარედაქციო კოლეგიის წევრის — ნორბერტ ბერნსდორფის სამეცნიერო პუბლიკაცია განიხილავს პერსონალურ მონაცემთა დაცვას ელექტრონული ვაჭრობის კონტექსტში, „ციფრული სერვისების აქტსა“ და მისი იმპლემენტაციის საკითხს ეროვნულ კანონმდებლობაში. ნაშრომს აქტუალობას სძენს ევროკავშირის „ციფრული სერვისების აქტით“ გათვალისწინებული ახალი ვალდებულებები ციფრული მომსახურების მიმწოდებლებისათვის, რაც მნიშვნელოვანია მონაცემთა სუბიექტების უფლებების დაცვის თვალსაზრისითაც. მსურს განსაკუთრებული მადლიერება გამოვთქვა პროფესორ ნორბერტ ბერნსდორფის მიმართ ჟურნალის ყველა გამოცემაში სამეცნიერო კონტრიბუციისა და სამსახურთან აქტიური თანამშრომლობისათვის.

მიუნსტერის უნივერსიტეტის ინფორმაციის, ტელეკომუნიკაციებისა და მედია სამართლის ინსტიტუტის დირექტორის — პროფესორ თომას ჰიორენის, ამავე უნივერსიტეტის ასისტენტ-მკვლევრის — ფილიპ მაიერისა და საერთაშორისო იურიდიული ფირმის ასისტენტ-მკვლევრის — გესა შენქეს თანაავტორობით შესრულებული ნაშრომი შეეხება *“Poena Sine Culpa”* პრინციპის არსსა და მოქმედების ფარგლებს პერსონალურ მონაცემთა დაცვის სამართალში. პუბლიკაციაში ასევე გაანალიზებულია ევროკავშირის მართლმსაჯულების სასამართლოს (“ECJ”) ერთ-ერთი უახლესი გადაწყვეტილება საქმეზე *“Deutsche Wohnen”*, რაც განსაკუთრებით ანგარიშგასაწევია პერსონალურ მონაცემთა დამუშავების კანონიერებისა და მონაცემთა სუბიექტის უფლებების დაცვის პერსპექტივიდან.

ივანე ჯავახიშვილის სახელობის თბილისის სახელმწიფო უნივერსიტეტის იურიდიული ფაკულტეტის ასისტენტ-პროფესორის, პერსონალურ მონაცემთა დაცვის სამსახურის უფროსის პირველი მოადგილის, სამართლის დოქტორ ოთარ ჩახუნაშვილის სამეცნიერო სტატიაში გაანალიზებულია პერსონალურ მონაცემთა დამუშავების კანონიერების შესწავლის პროცესში ადმინისტრაციულ სამართალდარღვევათა საქმის წარმოების პრინციპები. ნაშრომში საკითხი განხილულია პერსონალურ მონაცემთა დამუშავების კანონიერების ძირითადი პრინციპები, რომელთა შესაბამისად ჩვენი სამსახური შეისწავლის მონაცემთა დამუშავების კანონიერებას.

პრაქტიკული თვალსაზრისით უადრესად საინტერესო კვლევას წარმოადგენს ივანე ჯავახიშვილის სახელობის თბილისის სახელმწიფო უნივერსიტეტის იურიდიული ფაკულტეტის ასოცირებული პროფესორისა და ადვოკატის — სამართლის დოქტორ სერგი ჯორბენაძის ნაშრომი, რომელიც საადვოკატო საქმიანობის განხორციელებისას პერსონალურ მონაცემთა დამუშავების საკითხს შეეხება. ნაშრომში წარმოდგენილია პერსონალურ მონაცემთა დაცვის სამსახურის უახლესი პრაქტიკა და საკანონმდებლო სტანდარტი.

თანამედროვე ტექნოლოგიური პროგრესის ფონზე პერსონალურ მონაცემთა დაცვის ისეთ აქტუალურ საკითხებს, როგორებიცაა: დრუბლოვანი სისტემების მეშვეობით მონაცემთა დამუშავება, დასაქმებული პირის სამუშაო პროცესის/სივრცის ვიდეო-მონიტორინგი, ხელოვნური ინტელექტის სისტემების სამართლებრივი რეგულირება და პერსონალურ მონაცემთა დაცვასთან დაკავშირებული გამოწვევები, მონაცემთა დაცვა აკადემიური კვლევის პროცესში, პერსონალურ მონაცემთა დაცვის სამსახურის თანამშრომლები საკუთარ ნაშრომებში განიხილავენ.

მსურს განსაკუთრებული მადლიერება გამოვხატო თითოეული ავტორის მიერ წინამდებარე გამოცემის მომზადების პროცესში შეტანილი ფასდაუდებელი წვლილისა და გაწეული შრომისთვის. ჟურნალის მიზანია, ხელი შეუწყოს მონაცემთა დაცვის სტანდარტის გაუმჯობესებასა და ცნობიერების ამაღლებას. თითოეული ნაშრომი პროფესიულ დისკურსში მნიშვნელოვანი ღირებულების მქონეა და აღრმავებს საზოგადოების სამართლებრივ განათლებას. ვიმედოვნებთ, რომ, გამოქვეყნებული პუბლიკაციების სამეცნიერო და პრაქტიკული მნიშვნელობიდან გამომდინარე, წინამდებარე გამოცემა დიდ დახმარებას გაუწევს პროფესიონალ იურისტებს, ამ საკითხებზე მომუშავე მკვლევრებს და მიიზიდავს მკითხველთა ფართო წრეს.

## **ლოქტ., ლოქტ. ლელა ჯანაშვილი**

პერსონალურ მონაცემთა დაცვის სამსახურის უფროსი

ივანე ჯავახიშვილის სახელობის თბილისის სახელმწიფო უნივერსიტეტის ასოცირებული პროფესორი

ბარსელონის ავტონომიური უნივერსიტეტის ასოცირებული პროფესორი